

Nefndarálit

um frv. til l. um breyt. á l. nr. 28/1993, um stofnun hlutafélags um Sementsverksmiðju ríkisins.

Frá minni hluta iðnaðarnefndar.

Nefndin hefur fjallað um málið og á fund nefndarinnar komu fulltrúar frá Sementsverksmiðjunni hf. Akranesi, Starfsmannafélagi Sementsverksmiðjunnar, Verkalýðfélaginu á Akranesi, Akraneskaupstað og iðnaðarráðuneyti ásamt fulltrúa frá Samtökum iðnaðarins.

Minni hlutinn er efnislega ekki á móti sölu á Sementsverksmiðjunni hf. en gerir athugasemd við aðferðafræði ríkisstjórnarinnar og þar með iðnaðarráðherra. Innflutningur á sementi hefur aukist á undanförnum missirum. Sement er nú flutt inn frá Danmörku og mun hlutdeild innflutts sements vera 20–25% af heildarnotkun í landinu. Samkvæmt þeim upplýsingum sem minni hlutinn hefur er verð innflutta sementsins mun lægra en í útflutningslandinu og jafnframt lægra en sementsverð í öðrum löndum sem viðkomandi aðilar flytja út til. Sementsverksmiðjan hf. hefur kært meint undirboð samkeppnisaðilans til samkeppnisyfirvalda. Þau mál eru enn óútkljáð enda þótt ESA hafi kveðið upp þann úrskurð að Sementsverksmiðjan sé ekki ráðandi á markaði hérlandis. Það er alveg ljóst að biðtími eftir úrskurði ESA hefur verið verksmiðjunni dýrkeyptur og það hefur verið skoðun minni hlutans að ríkisstjórnin eða iðnaðarráðherra hefði átt að setja einhliða lágmarksverð á sement í landinu þar til málefni veksmiðjunnar væru komin á hreint.

Minni hlutinn telur að standa beri vörð um Sementsverksmiðjuna hf. og að strax hefði átt að setja lágmarksverð á sement til þess að vinna tíma og ganga úr skugga um samkeppnismál verksmiðjunnar og verðmyndun á innfluttu sementi. Minni hlutinn minnir á þingsályktunartillögu undirritaðs og Jóns Bjarnasonar á þskj. 32 um úttekt á verðmyndun á innfluttu sementi.

Minni hlutinn minnir einnig á tillögu sömu flutningsmanna á þskj. 133 um úttekt á framtíðarhlutverki Sementsverksmiðjunnar hf. við förgun spilliefna. Reikna má með að flestir landsmenn viti hvert meginhlutverk Sementsverksmiðjunnar á Akranesi er, en líklega hafa fæstir áttað sig á því að Sementsverksmiðjan getur gegnt lykilhlutverki hvað varðar förgun spilliefna og notkun á iðnaðarúrgangi. Nú þegar hefur verksmiðjan unnið brautryðjandastarf á því sviði. Í ofni Sementsverksmiðjunnar er brennt talsvert af olíu, framköllunarefnum og leysiefnum og hefur sú brennsla sparað umtalsverð kaup verksmiðjunnar á eldsneyti erlendis frá. Komið hefur fram í viðtölum við forráðamenn verksmiðjunnar að hún geti hæglega tekið að sér förgun aukins hluta úrgangsefna sem til falla. Má þar nefna gúmmí, svo sem hjólbarða sem hægt væri að nota í brennsluferli verksmiðjunnar, en einnig timburafganga og olíur af ýmsu tagi í meira mæli en gert hefur verið fram að þessu. Í fyrrgreindri þingsályktunartillögu er lagt til að gengið verði úr skugga um hvernig Sementsverksmiðjan getur í enn ríkari mæli unnið að förgun úrgangsefna. Gríðarlegt magn úrgangsefna fellur til í landinu, afgangsolíur af ýmsu tagi, timbur og gúmmíafgangar. Pappír sem til fellur er t.d. um 15–20 þús. tonn, timbur 14–15 þús. tonn, dagblöð 10–12 þús. tonn, plast 1.500–2.000 tonn og hjólbarðar

1.500–2.000 tonn. Verksmiðjan fargar nú þegar um 5.000 tonnum af fljótandi efnum sem eru nær eingöngu úrgangsolíur. Sum þessara efna eru flutt úr landi til förgunar en vegna eðlis sementsverksmiðja þar sem vara er unnin við mjög hátt brennslustig er talið að hún geti auðveldlega sinnt mun stærri hluta þessarar nauðsynlegu förgunar og jafnframt gæti það styrkt rekstur verksmiðjunnar að einhverju leyti.

Minni hlutinn telur afar brýnt að þessi úttekt á framtíðarhlutverki verksmiðjunnar varðandi förgun úrgangsefna fari fram áður en áformað verður að selja Sementsverksmiðjuna hf. Í umsögnum kemur fram að Sementsverksmiðjan hefur í samstarfi við Efnamóttökuna hf. látið vinna drög að skýrslu um brennslu úrgangsefna í ofni fyrirtækisins og telur þá málinu til framdráttar að fulltrúar frá fleiri aðilum hafa einnig komið að málinu. Forsvarsmenn Sementsverksmiðjunnar benda á að framtíðarförgun á þessum efnum sé að vísu háð því að hægt verði að tryggja framtíðarverkefni fyrirtækisins. Í umsögn Efnamóttökunnar hf. kemur fram að sementsverksmiðjur erlendis hafa lagt mikla áherslu á að fá úrgangsefni til brennslu í stað olíu og kola. Þannig losna verksmiðjurnar við kaup á eldsneyti og fá jafnvel greitt með brennslu úrgangsefnanna og viðkomandi samfélag þarf ekki að leggja til land undir urðun þeirra úrgangsefna sem þannig er unnt að brenna eða eyða þeim með öðrum og oft dýrari hætti. Með úrvinnslulögum skapast hagrænir hvatar til að safna umbúðaúrgangi, hjólbörðum o.fl. og þau lönd sem hafa á annað borð einhver umhverfismarkmið leitast við að nýta urðun úrgangs eins og kostur er. Sum úrgangsefni er hægt að endurvinna sem hráefni í aðra framleiðsluvöru en fyrir önnur efni þarf að finna aðrar úrvinnsluaðferðir. Á Íslandi er núna engin úrvinnsluaðferð fyrir hjólbörða nema urðun. Hjólbörða og ýmsan umbúðaúrgang er tiltölulega einfalt að brenna til orkuvinnslu eða til að koma í stað annarra orkugjafa. Þannig getur Sementsverksmiðjan hf. gegnt stóru hlutverki. Það yrði því verulegt áfall fyrir úrvinnslu- iðnaðinn hér á landi ef brennslu úrgangsefna yrði hætt í Sementsverksmiðjunni hf. Þá þarf að koma þessum efnum annað, í flestum tilfellum til útlanda með tilheyrandi kostnaði. Einnig þarf að hafa í huga að reglur um flutning úrgangsefna á milli landa verða sífellt strangari. Það er því ákaflega mikilvægt að tryggja megi rekstur Sementsverksmiðjunnar á Akranesi til frambúðar.

Minni hlutinn leggur til að frumvarpinu verði **vísað til ríkisstjórnarinnar.**

Alþingi, 11. mars 2003.

Árni Steinar Jóhannsson.

Fylgiskjal.**Umsagnir um þingsályktunartillögu um úttekt á framtíðarhlutverki
Sementsverksmiðjunnar hf. við förgun spilliefna.**

(133. mál 128. löggjafarþings.)

Umsögn samtaka atvinnulífsins.

(25. nóvember 2002.)

Samtök atvinnulífsins leggja á það áherslu að endurnýting úrgangs og förgun/eyðing spilliefna í ofni Sementsverksmiðjunnar hf. sé raunhæfur og hagkvæmur kostur miðað við þá meðferð sem slíkur úrgangur fær í dag. Ennfremur er lögð á það áhersla að haft sé samráð við stjórnvöld og starfandi atvinnurekstur á svæðinu áður en ráðist er í slíka framkvæmd.

Greinargerð

Það er alkunna að sementsverksmiðjur í nágrannalöndum okkar hafa löngum verið nýttar til að endurnýta úrgang, þ.e. til að brenna úrgang í þeim tilgangi að nýta orkuna sem við það losnar. Ennfremur hafa slíkar verksmiðjur verið nýttar til að farga eða eyða úrgangi. Þannig hefur Sementsverksmiðjan hf. á Akranesi endurnýtt nær alla úrgangsolíu sem til hefur fallið á landinu um langt árabíl.

Á landinu eru starfandi nokkrar brennslustöðvar sem aðallega brenna húsasorpi og nýta að miklu leyti þá orku sem við brennsluna vinnst. Þörf er á brennslustöðvum sem brennt geta sérhæfum úrgangi svo sem hjólbörðum, plasti, olíu og leysiefnum og um leið nýtt þá orku sem við það losnar. Sementsverksmiðjan hf. er tæknilega kjörin til slíkra verkefna og vel í sveit sett á höfuðborgarsvæðinu þar sem stærsti hluti úrgangsins fellur til.

Brennsluofn Sementsverksmiðjunnar hf. er einnig kjörinn til að farga eða eyða ýmsum spilliefnum sem ella verður að flytja úr landi til eyðingar með ærnum tilkostnaði. Við það hitastig sem efnið nær í brennsluofninum, um 1450°C, eyðast nær öll lífræn efnasambönd og leysast upp í frumþætti sína. Þannig er tæknilega auðvelt að eyða ýmsum spilliefnum sem hingað til hafa verið flutt úr landi til eyðingar. Má þar nefna framkallara, fixer, leysiefni, klóreruð kolvatnsefni, olíumálningarleifar, prentlitaúrgang o. fl.

Ef átlunin er að færa út starfsemi Sementsverksmiðjunnar hf. með þessum hætti, þá leggja Samtök atvinnulífsins á það áherslu, að sú framkvæmd fari fram í fullu samráði og sátt við stjórnvöld á staðnum og atvinnustarfseminna á svæðinu. Starfsleyfi Sementsverksmiðjunnar skal taka mið af nýrri og aukinni starfsemi, og vegna návistar Sementsverksmiðjunnar hf. við löndun og vinnslu sjávarfangs skal leita álits Fiskistofu og helstu söluaðila sjávarfangs áður en í framkvæmd er ráðist.

Virðingarfyllst,
f.h. Samtaka atvinnulífsins

Óskar Mariusson.

Umsögn Byggðastofnunar, þróunarsviðs.
(26. nóvember 2002.)

Hlutverk Byggðastofnunar er að vinna að eflingu byggðar og atvinnulífs á landsbyggðinni og miðast eftirfarandi umsögn við áhrif tillagnanna á þá þætti. Tekið er fram að ekki hefur verið fjallað um umsögnina í stjórn stofnunarinnar.

Byggðastofnun telur mikilvægt að tekið sé með skipulegum hætti á förgun spilliefna. Stofnunin telur að það sé á verksviði iðnaðarráðherra og umhverfisráðherra að láta meta með hvaða hætti þessum málum er best fyrir komið.

Virðingarfyllst,

Bjarki Jóhannesson
forstöðumaður þróunarsviðs.

Guðmundur Guðmundsson
ráðgjafi.

Umsögn iðnaðar- og viðskiptaráðuneytis.
(2. desember 2002.)

Ráðuneytið vísar til bréfs yðar, dags. 14. nóvember 2002, þar sem óskað er umsagnar um tillögu til þingsályktunar um framtíðarhlutverk Sementsverksmiðjunnar hf. þingskjal 133. Það er ljóst að Sementsverksmiðjan gegnir mikilvægu hlutverki við förgun úrgangsefna í dag og mun að óbreyttu gegna mun mikilvægara hlutverki í framtíðinni. Ráðamenn verksmiðjunnar hafa verið að vinna að þessum málum m.a. í samvinnu við Efnamótökuna hf og Spilliefnanefnd. Sementsverksmiðjan og Efnamótakan hafa undirritað viljayfirlýsingu og er markmið aðila að auka endurvinnslu úrgangsefna hér á landi, minnka þörf fyrir innflutt eldsneyti og bæta umhverfisímynd beggja fyrirtækja og landsins út á við. Búið er að vinna frumskýrslu að hálfu Sementsverksmiðjunnar um málið þar sem m.a. er farið yfir hvaða eignum er hægt að eyða, ávinningur samfélagsins og áætlaður kostnaður vegna fjárfestinga. Af þeirri skýrslu má ráða að það er óneitanlega hagur samfélagsins að Sementsverksmiðjan haldi áfram starfsemi sinni og taki aukinn þátt í eyðingu úrgangsefna. Að öðrum kosti munu Íslendingar í auknu mæli þurfa að flytja úrgangsefni úr landi þar sem leyfi til urðunar úrgangsefna eru alltaf að þrengjast. Ráðuneytið telur ekki þörf á þessu stigi að gerð sé frekari úttekt á þessum tíma en tekur undir að þörf sé á slíkri úttekt í framtíðinni.

F.h.r.

Þorgeir Örlygsson.
Gunnar Örn Gunnarsson.

Umsögn Efnamóttökunnar hf.
(2. desember 2002.)

Efnamóttakan hf. þakkar fyrir að fá til umsagnar þingsályktunartillögu um að fela iðnaðarráðherra að láta gera úttekt á framtíðarhlutverki Sementsverksmiðjunnar hf.

Sementsverksmiðjur erlendis hafa lagt mikla áherslu á að fá úrgangsefni til brennslu í stað olíu eða kola. Þannig losna verksmiðjurnar við kaup á eldsneyti og fá jafnvel greitt með brennslu úrgangsefnanna. Viðkomandi samfélag þarf ekki að leggja til land undir urðun þeirra úrgangsefna sem þannig er unnt að brenna, eða eyða þeim með öðrum og oft á tíðum dýrari hætti.

Með væntanlegum úrvinnslulögum skapast hagrænir hvatar til að safna í auknum mæli umbúðaúrgangi, hjólborðum o.fl. Þau lönd sem á annað borð hafa einhver umhverfismarkmið leitast nú við að minnka urðun úrgangs eins og kostur er. Sum efni er hægt að endurvinna sem hráefni í aðra framleiðsluvöru, en öðrum efnum þarf að finna annan farveg. Fyrir Alþingi liggur frumvarp til laga um meðhöndlun úrgangs og þar kemur fram að innan fárra ára verður bannað að urða hjólbarða. Á Íslandi er núna enginn farvegur fyrir ónýta hjólbarða nema í urðun. Hjólbarða og ýmsan umbúðaúrgang er tiltölulega einfalt að brenna til orkuvinnslu eða til að koma í stað annarra orkugjafa. Þar getur Sementsverksmiðjan gengt stóru hlutverki. Nú þegar er brennt í ofni Sementsverksmiðjunnar talsverðu magni af olíu, framköllunarefnum og leysiefnum og hefur sú brennsla þegar sparað umtalsverð kaup verksmiðjunnar á eldsneyti erlendis frá.

Það yrði verulegt áfall fyrir úrvinnsluiðnaðinn hér á landi ef brennslu úrgangsefna yrði hætt í Sementsverksmiðjunni. Þá þarf að koma þessum efnum í aðra farvegi, í flestum tilfellum erlendis, með tilheyrandi kostnaði. Einnig þarf að hafa í huga að reglur um flutning úrgangsefna milli landa verða sífellt strangari. Efnamóttakan hf. hvetur því Alþingi til að skoða hvernig tryggja megi rekstur Sementsverksmiðjunnar á Akranesi til frambúðar.

Virðingarfyllst,
f.h. Endurvinnslunnar hf.

Gunnar Bragason
framkvæmdastjóri.

Umsögn Samtaka iðnaðarins.
(18. nóvember 2002.)

Sementsverksmiðjan hf. hefur mikilvægu hlutverki að gegna við endurnýtingu og förgun úrgangs. Það hlutverk verður æ mikilvægara eftir því sem gerðar eru ríkari kröfur til umhverfismála og meðferðar úrgangs, þar á meðal spilliefna.

Meginhlutverk Sementsverksmiðjunnar er og verður auðvitað að framleiða sement fyrir íslenskan markað. Síðustu misseri hafa verið blikur á lofti í rekstrinum sem stafa fyrst og fremst af því að Aalborg Portland hefur byrjað að selja sement á Íslandi og hefur kosið að fara þá leið að bjóða verð sem er undir söluverði í Danmörku og í Færeyjum. Þau mál eru til meðferðar hjá íslenskum samkeppnisyfirvöldum og Eftirlitsstofnun EFTA og vekur ugg hversu langan tíma þessi yfirvöld gefa sér til skoðunar á málinu.

Á sama tíma og Sementsverksmiðjan hefur mátt takast á við þessa óeðlilegu samkeppni hefur orðið mikill samdráttur á sölu á sementi og hefur þetta tvennt orðið til þess að tvísýnt fer að verða um að rekstri verksmiðjunnar verði haldið áfram mikið lengur.

Komi til þess að rekstur Sementverksmiðjunnar stöðvist tekur við einokun Aalborg Portland á íslenskum sementsmarkaði og þarf ekki að fjölyrða um það að þau kostakjör sem nú bjóðast hjá fyrirtækinu yrðu úr sögunni. Einokun Aalborg Portlands á íslenskum sementsmarkaði verður fráleitt betri en núverandi fyrirkomulag.

Samtímis hyrfti núverandi aðstaða til förgunar úrgangsolíu auk þess sem mjög er horft til Sementsverksmiðjunnar við endurnýtingu og förgun úrgangs á borð við hjólbarða, plasts og fleiri efna í tengslum við frumvarp til laga um meðhöndlun úrgangs sem liggur fyrir Alþingi. Hætti Sementsverksmiðjan þarf að leita annarra leiða og jafnvel að flytja efnin til útlanda til endurnýtingar og förgunar með ærinni fyrirhöfn og tilkostnaði.

Hvort tveggja er mjög slæmt að mati Samtaka iðnaðarins.

Samtök iðnaðarins styðja því eindregið að íslensk stjórnvöld láti kanna framtíðarhlutverk Sementsverksmiðjunnar við endurnýtingu og förgun úrgangs, ekki síst spilliefna, m.a til þess að styrkja rekstrargrundvöll hennar og leysa samtímis brýn úrlausnarefni á sviði umhverfismála með hagkvæmum hætti.

Samtök iðnaðarins

Jón Steindór Valdimarsson
aðstoðarframkvæmdastjóri.

Umsögn spilliefnanefndar.
(5. desember 2002.)

Með bréfi dags. 14. nóvember s.l. óskar Iðnaðarnefnd Alþingis eftir umsögn Spilliefnanefndar um ofangreint frumvarp. Nefndin hefur haft frumvarpið til skoðunar og vill gera neðangreindar ábendingar.

Sementsverksmiðjur hafa víða veigamiklu hlutverki að gegna við endurnýtingu og eyðingu spilliefna. Hér á landi hefur ekki verið talinn grundvöllur vegna fámennis og lágs orkuverðs til þess að starfrækja sérstakar brennslustöðvar fyrir spilliefni. Því hefur helst verið horft til þess að nýta mætti eiginleika Sementsverksmiðjunnar í ofangreindum tilgangi. Hin almenna regla er að spilliefnum skuli eytt í því landi sem þau falla til. Öll spilliefni önnur en úrgangsolía og leysiefni hafa verið flutt héðan til annarra landa fram til þessa þrátt fyrir framangreinda meginreglu.

Sementsverksmiðjan hf. hefur brennt nær allri úrgangsolíu sem til fellur á landinu, sem hefur verið um fimm þúsund tonn á ári og leysiefnum, um 70 tonnum á ári. Spilliefnanefnd hefur vænst þess að verksmiðjan tæki ríkari þátt í að fyrirkoma spilliefnum og átt frumkvæði að fundum þar að lútandi. Eyðing á framköllunarvökvum er nú hafin í verksmiðjunni en af þeim hafa fallið til yfir 200 tonn á ári.

Verði frumvarp til laga um úrvinnslugjald að lögum má ætla að hlutverk verksmiðjunnar gæti enn aukist við endurnýtingu annars úrgangs en spilliefna, svo sem hjólbarða og plasts. Verði sá kostur ekki til staðar að nýta megi eiginleika verksmiðjunnar til endurnýtingar eða eyðingar takmarkast mjög möguleikar til að fyrirkoma spilliefnum sem og öðrum úrgangi hér á landi og þar með að fylgja þeirri meginreglu sem getið er hér að ofan — að förgun skuli fara fram í því landi sem spilliefni falla til í.

Spilliefnanefnd mælir af ofangreindum ástæðum með því að úttekt verði gerð á framtíðarhlutverki Sementsverksmiðjunnar hf. með tilliti til förgunar spilliefna og annars úrgangs.

F.h. spilliefnanefndar

Már Karlsson.

Umsögn Hollustuverndar ríkisins.
(5. desember 2002.)

Sementsverksmiðjan gegnir í dag mikilvægum hlutverki við nýtingu úrgangsefna í landi. Sementsverksmiðjan h.f. nýtir í dag um 5000 tonn af úrgangsolíu, sem eldsneyti en annars þyrfti að farga þeirri olíu sem spilliefni. Jafnframt hafa verið nýtt um 1000 tonn af skautleifum sem eldsneyti og nú stendur yfir tilraun á eyðingu framköllunarvökva í verksmiðjunni. Aðaleldsneyti verksmiðjunnar í dag eru kol og er notkun þeirra um 12 til 17000 tonn á ári. Í stað einhvers hluta þeirra má hugsa sér að nýta úrgang sem er orkuríkari en kol. Það sem liggur beinast við þar eru hjólbarðar og ýmiss konar umbúðaplast, sem má ætla að séu um 5000 tonn á ári. Nýting þessara efna ætti að tengjast mjög vel við þá stefnu sem verið er að marka með frumvörpum umhverfisráðherra til laga um úrvinnslugjald og meðhöndlun úrgangs.

Sementsverksmiðjan hefur í dag heimild í starfsleyfi til að nýta þau spilliefni sem hagkvæmt er fyrir hana að nýta. Jafnframt hefur verksmiðjan heimild í starfsleyfi til að nýta orkuríkan fastan orkugang, en búnaður til að mata slíkan úrgang er ekki fyrir hendi. Þegar slíkur búnaður er til staðar verður ef til möguleiki til að taka inn önnur spilliefni til brennslu í ofninum, en heimild fyrir slíkri eyðing er ekki fyrir hendi í starfsleyfi nema að hluta. Stofnunin bendir hins vegar á að nauðsynlegt sé að gera heildaráætlun um endurnotkun og förgun orkuríks úrgangs og spilliefna hér landi og í því sambandi hlýtur breytt hlutverk verksmiðjunnar að koma til skoðunar og hagkvæmni metin í samanburði við aðra kosti.

Virðingarfyllst,
f.h. Hollustuverndar ríkisins

Davíð Egilson
forstjóri.

Helgi Jensson
forstöðumaður.

Umsögn Iðntæknistofnunar.
(2. desember 2002.)

Iðntæknistofnun vill taka undir þau sjónarmið sem fram koma í ofangreindri tillögu.

Það er ljóst að í ofni verksmiðjunnar er unnt að farga ýmsum efnum, án þess að gæð / sements rými, en það gerir kröfu til að fylgst verði með útblæstri frá verksmiðjunni og að til staðar verði viðeigandi hreinsibúnaður.

Mikilvægt er að hugað verði að því að samkeppnisstaða skekkist ekki á þeim markaði sem verksmiðjan starfar á.

Virðingarfyllst,

Hallgrímur Jónasson
forstjóri.

Umsögn Samtaka verslunar og þjónustu.
(2. desember 2002.)

Með þessari tillögu er gert ráð fyrir að framtíðarhlutverk Sementsverksmiðjunnar við förgun spilliefna verði kannað.

SVÞ gera ekki athugasemdir við þessa tillögu sem hlýtur að teljast eðlileg þegar haft er í huga hversu mikið öll förgun úrgangsefna er að breytast og nægir í því sambandi að vísa til frumvarps til laga um úrvinnslugjald, 337. mál, sem nú er til meðferðar í þinginu. Tilvist Sementsverksmiðjunnar hf. sem sementsframleiðanda hlýtur ætíð að ráðast af því að verksmiðjan sé fær um að framleiða og selja samkeppnisfæra vöru. Förgun spilliefna er annað mál. Möguleikar verksmiðjunnar til að brenna úrgangsefnum er nokkrir nú þegar, en upplýst hefur verið að leggja þurfi í fjárfestingu upp á meira en 200 milljónir til að hægt sé að taka til brennslu hjólbarða o.fl. sem óskir hafa komið fram um að hægt sé að brenna. Hvar sú fjárfesting verður gerð og hvort það fjármagn gæti nýst betur í öðrum sorpbrenslum er sjálfstætt úrlausnarefni þar sem staðarval o.fl. skiptir máli. En þar sem verksmiðjan er ríkisrekin verður að tryggja að greiðslur fyrir brennslu sem verksmiðjan semdi um við opinbera aðila væru aldrei meiri en eðlilegt teldist fyrir þá vinnslu og bjagaði því ekki samkeppni á sementsmarkaðinum.

Virðingarfyllst,

Sigurður Jónsson
framkvæmdastjóri.